

# ZENESISI

## Sapata 1

### *Gotibamubo bukibuki namo lohie*

<sup>1</sup>Genagamo fusafasa'amo Gotibamubo igopamo okulumabo buki namo lohie. <sup>2</sup>Igopamo nokopa auva gavabo huna a'haneva ligibo vato auva gavabo huna hane. Lapogomakobo sipi nitobo aona sau huna hanegana Goti Aune Me'amo ona nikovetulobo vulona olona hie. <sup>3</sup>Noseganahebo Gotibamubo gobo lio higana gobo lie. <sup>4</sup>Gobo lina halegana golona soko hema bosebo mogagamo aie. Hulona gobo lite na'ese hanebo hute na'esebo lina hetama aie. <sup>5</sup>Gobo lite bosebo gi'aonahebo fegafegae huna gi'aolona lapogohebo hane'inagae huna gi'aolo hie. Hanebo hulona gobo lima bosebo naba vani vitabo hane.

<sup>6-7</sup>Hulona Gotibamubo nahuna hie: Hatamo faina laga henagana nibo ole haopalogamo hanogie huna. Hima bosebo nibo lina hetama aina vehilogamo hanolo avetogamo hanolo huna hane. <sup>8</sup>Nagi faina laga huna hanema hatahebo okulumanae huna gi'ae. Hanebo hulona gobo lima bosebo naba tu vitabo hane.

<sup>9</sup>Hulona Gotibamubo avetogamo hano'ema nisebo vuka haopa bogotogamo aoka ligi henagana hau hisima haopamo folo aigie huna higana folo aie. <sup>10</sup>Nahuna folo aema haopahebo igopae huna hulona vuna aona ligi hema nisebo solovalanae huna gi'ae. Hima gelobo belema bosebo golona soko hema bosebo mogagamo aie. <sup>11</sup>Hulegana Gotibamubo igopahebo vatovato auva zavamo gavomo dotenamo lika folo aio huna hima gelobo bolona lina folo aie. <sup>12</sup>Vatovato zavamo gavomo dotenamo na'igopalobo folo aegana golona soko hema bosebo mogagamo aie. <sup>13</sup>Hanebo hulona gobo lima bosebo naba tili vitabo hane.

<sup>14</sup>Hulona Gotibamubo ganibo folo aika okulumatogamo hanoloka fegafega'ese hane'esebo lika vatovato huka pa'ato huna. Gaimo fegafegamo gavugamo aina vatovato gana'esebo leke paeno huna. <sup>15</sup>Okulumatogamo folo aileta igopavinagamo ganibo aeo huna higana ganibo ae. <sup>16</sup>Gotibamubo nahuna sipi ganibo olemo lina folo aie. Sipi'amo zegemo fegafegamo ganibo aesemahebo hanolo havana'amo gaimo hane'inagamo ganibo aesemahebo hane. Hulona geneve'esebo lohie. <sup>17</sup>Naganibo

okulumatogamo potonahebo igopavibo ganibo aesamahebo pete.  
<sup>18</sup>Fegafegamo zegemo lesigana hane'inagamo gaimo ohisimahebo vatovato huna hane'ese halote na'esebo pa'ate. Buki namo soko hema bosebo golona mogagamo aie. <sup>19</sup>Hanebo hulona gobo lima bosebo naba fo vitabo hane.

<sup>20</sup>Hulona Gotibamubo nahuna hie: Solovala nipibo vatovato auva namo fahaevabo hanote namo havaiteo huna. Namazuva'esebo folo aileta okulumatogamo haleli haleli hio huna hie. <sup>21</sup>Gotibamubo nahuna legepa fazabo lohulona vatovato auva fazabo fenimo huna solovala nipibo pete. Potolona vatovato auva namazuva'esebo lohie. Lohulona gemana soko hema bosebo mogagamo aie. <sup>22</sup>Hulona Gotibamubo soko huna petesema gemo bogo fahapaie. Fahapainahebo pagaemo solovalapinagamo bademo lita petesagana vida eda hida havaiteno huna. Hileta pagaemo namazuvamo la'amo ma'igopavibo folo aeo huna hie. <sup>23</sup>Hanebo hulona gobo lima bosebo naba faefu vitabo hane.

<sup>24</sup>Hulona Gotibamubo igopahebo nahuna hie: Vatovato auva hamuzagamo fahaevaebob hanote namo lika folo aio huna. Zotoga hamuzagamo legepa'amo havana'amo gavovinaga namo gavadagalemo havana na'esebo lika folo aio huna higana folo aie. <sup>25</sup>Gotibamubo lina folo aemamo zotoga hamuzagamo gavovinaga hamuzagamo legepa'amo havana'amo lina folo aie. Folo aema namo golona soko hema bosebo mogagamo aie.

<sup>26</sup>Hulona Gotibamubo nahuna hie: Hemetimo zademo lagaeti'akata huta lohenagana lagaekata hida habelegae huna. Lohuta petesopa zademagimo fazatobo namalobo hamuzagalobo igopalobo hano'ema nalobo buki nalobo gava higae huna.

<sup>27</sup>Hulona Gotibamubo vemo abo gae'agakata huna lohie.

<sup>28</sup>Lohulona soko huna petesema gemo hunahebo pagaemo vavulita bademo lita petenagana vida eda hida buki haopalogamo baileda gava higae huna. Fazabo namamo vatovato auva hamuzagamo potomamo pagaemagilamo gava hisamahebo potoe huna. <sup>29</sup>Hulona Gotibamubo nage'esebo hie: Dagaemo pumumamo vatovato auva zavamo gavomo dotenamabo laga'amo haolona folo aesima namo pumue huna. Pumumamo pagaemo desamahebo pumue huna. <sup>30</sup>Pumuma bolava hamuzagamo namamo hida desamahebo aigava sagava zavasamo gavomo pumue huna. Gotibamubo hima gelobo bolona folo aie. <sup>31</sup>Gotibamubo buki namo folo aema namo golona soko hema bosebo lusi huna mogagamo aie. Hanebo hulona gobo lima bosebo naba sikisi vitabo hane.

## Sapata 2

<sup>1</sup>Nahuna hima gavababo Gotibamubo okulumabo igopamo buki namo hano'ema na'esebo lohie. <sup>2</sup>Lohulona naba seveni ganavibo Gotibamubo gonahebo buki fozamo suhema bosebo a'aina vitabo femo baie. <sup>3</sup>Hulona naba seveni ganahebo vato auva ganadimo hane huna. Buki salevitibo dagae sipi ganadimo hanogie huna. Bukibuki namo lohuna suholona navitabo femo baema bosebo hie.

<sup>4</sup>Nahuna hima gavatotikobo Gotibamubo okulumabo igopamo buki namo lina folo aie.

*Gotibamubo Ideni fozamo lina folo aie*

Sipi Demo Gotibamubo igopamo okulumabo lina folo aema vitabo <sup>5</sup>zavamo gavomo a'hane. Gobo aigie asulo zademo fozamo vaeda desama zademo abaile hama bosebo a'hane.

<sup>6</sup>Navitabo gobo a'aima bolava buki haopaloga igopavitibo betimo hogona ohilona na'igopavibo vuna ona hie.

<sup>7</sup>Sipi Demo Gotibamubo igopamo lilona vemo lina lohie. Hulona gotavibo fuvu higana haevabo lilona aune mebo lie.

<sup>8</sup>Ideni haopalogamo Sipi Demo Gotibamubo fozamo bogu lina folo aibele. Zegemo no'ohema haopalogamo lina folo aema fozavibo lohema demo te. <sup>9</sup>Tolona igopahebo vatovato zavamo lika folo aio higana folo ailona soko dote laga'amo hae. Bukibuki zavamo soko zavagobo hanema folagapibo ole zavamo hane. Hanema zava olivitibo bogu zavamo baige baige paune pemebo pimate zavamo hanolegana bogu zavamo soko gavatogamo ho'asima gavatogamo havite zavamo hane.

<sup>10</sup>Bogu nibo betimo hogona folo ailona Ideni fozavibo limina vuna ona hulona gopaona fo'amo limie. <sup>11-12</sup>Naba vanimo gopaema niba gi'amo Pisoni nibo limina Havila haopalogamo aina vego hima haopalogamo soko golimo hane. Hulona zavama ni'amabo soko tumo no'aema zavamo hanolo zavabo bina'amo haina gasao'ema zavaba gi'amo kaniliani zavabo hane. <sup>13</sup>Naba tu niba gi'amo Gihoni nibo limilona aina vego huna Kusi haopalogamo limie. <sup>14</sup>Lemegana naba tili niba gi'amo Taigilisi nibo limina zegemo no'ohema haopalogamo Asiliabo limilegana naba fo nibo gi'amo Zufeletisi nibo hane.

<sup>15</sup>Hulona Sipi Demo Gotibamubo lohema demo gavailina vuna Ideni fozavibo te. Ma'aina fozalobo gava huna baesimahebo. <sup>16</sup>Hulona nahuna hapaie: Kagaemo buki zavama laga'amo hava'a dogapa <sup>17</sup>bolava kagaemo soko gavatogamo ho'asima gavatogamo havite zavalaga'amo ado huna. Kagaemo desapamo haebo filigane huna hapaie.

<sup>18</sup>Hulona Sipi Demo Gotibamubo nahuna hie: Mademo gae'amo bogokotomo baemamo soko asima bosebo bogu valo'amabo lohuda menagana habaogie huna. <sup>19-20</sup>Hulona igopamo lilona hamuzagamo namamo lohulona nadelogamo pagavailina vie. Pigimo pemesimahebo pagavailina vigana bogoko bogoko hamuzagamo namamo pigimo pimie. Pigimo piminisebo zotoga hamuzagamo pimilona gavovinaga hamuzagamo pimilona namazuva'esebo pemema pigilokobo no'aone. Hima bolava lokaeda'a baileda'a habaesema gonogobo abaie.

<sup>21</sup>Hima bosebo Sipi Demo Gotibamubo navekamo sipi aubo megana haona fili'egana hao'izapa apuvamo liloni lima aovamo faganina te. <sup>22</sup>Faganina tolona Gotibamubo lima apuvalotibo abo lohulona vedelogamo gavailina vigana <sup>23</sup>na'abo golona hemetinae huna. Davalodimabae huna. Apova'amo dagae dapovadilotibo folo ailo me'amo dagae demedilotibo folo ailo hima bosebo alae huda gi'aogue huna. <sup>24</sup>Hima bosebo vemagimo abo lileda ita'inamagi avo'inamagimo peteleda eda a'ina'esebo bogoko pauvamo ne'habalae.

<sup>25</sup>Na'itotolimo bogo namo pa'aovalobo a'hanema bosebo pa'auzamo asie.

### Sapata 3

#### *Goti gemo begeda'a tala'ae*

<sup>1</sup>Sipi Demo Gotibamubo bukibuki hamunamamo lohema bolava bogo hamunamamamubo gavadagalemo pegeta faite

nalogamo gasaesama'amo ligibo abaie. Higana gavadagale demamubo a'aina asebo nahuna loka huna havie: Gotibamubo fa'ahapainisebo bukibuki zavamo ma'upavibo hano'ema zavalagamo ade'eo huna hu'ivie huna. <sup>2</sup>Higana na'abamubo e'e huna. La'agaemo buki zavama laga'amo ma'upavitibo dogu'ae huna. <sup>3</sup>Hima bolava folagapibo hano'ema zavama laga'amo ade'eo huna hulona pa'anotamo lige dege hisa'amamo fililega'ae huna hu'ie huna. <sup>4</sup>Higana gavadagale demabo e'e huna. Pa'agaemo afiliga'ae huna. <sup>5</sup>Hiva Gotibamubo havinisebo pa'agaemo zavalagamo desa'ama vitabo pa'agetamo hakalo huna pa'atenagatina'a haveta'ahebo soko gavatogamo ho'asima gavatogamo havega'ae huna. Hileta'a pa'agaemo gae'akata hita'a havite bosebo a'haigana nazavama laga'amo ade'eo huna hu'ie huna.

<sup>6</sup>Higana na'abamubo nazavamo gonisebo soko laga'amo desuma laga'amo hane huna ge. Golona getamo havinisebo soko hu'imagada doloda buki navinagamo havigue hulona ligina dolona ete'a'esebo megana de. <sup>7</sup>Da'ama vitabo pa'agetamo

hakalo hegana geda'a aeto hida'asebo la'aovakapakobo bai'u'ae hida'a geda'a aeto ha'ae. Hileda'a fiki zavama sa'amo faganileda'a pa'aovalobo bozobo vaigo qaemo piqo ha'ae.

<sup>8</sup>Hileda'a aute'amo folomo ligana haveda'asebo Sipi Demo Gotibo nafozavibo no'humonegana havileda'a a'la'agogie hileda'a zava aepavinagamo vida'a falaki'ae. <sup>9</sup>Falaki'a'agana Sipi Demo Gotibamubo vedehebo ge'aona haiza bai'ane huna. <sup>10</sup>Higana vedemamubo Goti ge'alobo nahuna hapaie: Dagaemo havidisebo kagaemo upavinagamo no'humoninagada domotomo aema bosebo falaki'ue huna. Dagaemo daovadapakobo bai'uma bosebagadae. <sup>11</sup>Higana Gotibamubo nahuna loka huna havie: Gabamubo hagapaegaka daovadapakobo bai'ue huka havi'ane huna. Dagaemo dagalu'ae huda hu'uma zavalagamo ligika do'apie huna. <sup>12</sup>Higana abo lohuka dimiloka kavalokamabae huka hu'apa abamukobo a'aina zavalagamo demegada do'ue huna. <sup>13</sup>Higana Sipi Demo Gotibamubo nahuna a'aina asebo loka huna havie: Haiza gava higaka nagavabo hane huna.

Higana gavadagale demamukobo huna dimibelegada zavalagamo do'ue huna hie.

*Gemo bigima zuvahebo Gotibamubo nagemo hu'ie*

<sup>14</sup>Sipi Demo Gotibamubo gavadagalehebo nahuna hapaie: Nahuka ho'asima gavabo hapa bosebo hakeli'a gemo huda lida faipa huda kotogue huna. Gatamo lisapamo bogo kaiga hamuzagamo pagasaoka bogo'e gatamo ligane huna. Hemeti'ese henaga'a'esebo kaipalotikobo boloka falaika vulo olo nosuka igopaviti bumusopamo dogane huna. <sup>15</sup>Dagaemo hinagatina'a kagae'ese na'a'esebo gamemo baega'ae huna. Baileta'a kagae badelubagimo na'aba badelu'esebo gamemo baegae huna. Nosenaganahebo na'aba bademamubo latakamo aona lali paenagaka aizavibo hanigane huna.

<sup>16</sup>Hulona Gotibamubo na'asebo nahuna hapaie: Dagaemo hinagaka kagaemo kaipa'ebo baesapa vitabo sipi gatamo ligane huna. Bademo lika tesapa vita'esebo sipi kagavubo kigima bolava sipi huna etekahebo hagaenagana gava huna kotogie huna.

<sup>17</sup>Hulona Gotibamubo Adamusebo nahuna hapaie: Kagaemo akama gemo haviloka dagalu'ae huda huma zavalagamo ligika dane huna. Hapa bosebo hemetimo dagaemo igopamo lida faipa hinagana dotenamo soko huna folo a'aigie huna. Buki vitabo kapovamo boloka fozamo linagana desapa dotenamo folo aeno huna. <sup>18-19</sup>Ufe'afe gavumo hepa gavumo fozakavibo ligina aona sau hugie huna. Hinagaka hakeli'a fozamo linagana kalemo no'aenagaka dotenamo lika folo aika dogane huna. Nahuka hakeli'a fozamo limo vuka felenagana igopavibo geli vaeda keteno huna. Igopalotibo lohuda kotoma bosebagakae huna hie.

<sup>20</sup>Higana vemamubo asebo lvi'ae huna gi'aemamo buki veademagi itoto'inamabo baesima bosebae. <sup>21</sup>Higana Sipi Demo Gotibamubo galema aova'alotibo pa'aovalo namo lohuna Adamukene nalu'amakenebo pa'amegana kalo vai'ae.

*Gotibamubo Adamukene Ivikenebo nafozavitibo  
fa'ahavaina pa'atele*

<sup>22</sup>Sipi Demo Gotibamubo nahuna hie: Navekamo soko gavatogamo ho'asima gavatogamo havema bosebo lagaekata huna habele huna. Hima bosebo lagaemo gota telenagana vuna



baige baige paune pemebo pimate zavama aova'alobo a'vugie huna. Nazavama laga'amo ligina dolona baigo baigo huna bailogimagatae huna. <sup>23</sup>Nagemo hulona Sipi Demo Gotibamubo Ideni fozavitibo havaina tele. Havaina telegana vunahebo hegotona lina lohuna to'ema igopalobo bailona na'igopalobo fozamo vailona fozamo hakalesemahebo havaina tele. <sup>24</sup>Gotibamubo navegene akenebo fa'ahavaina pa'atololona hakeli'a enisolemo leke paigana vida zegemo no'ohema haopalogamo baileda Ideni fozalobo zagaeda baie. Hulona hagitalobo halemabo ganibo ao'ema hagitamabo ailona hagalae ailona huna baesimahebo bele. Na'enisolezuva'ese hagita'ebo nafozalobo zagaeda bai'enagana bogo zavamo baige baige paune pemebo pimate zavama aova'alobo a'visamahebo petegana zagaeda baie.

This book has been translated and published by New Tribes Mission. Please do not reproduce or copy in part or whole without written consent.

Printed by

New Tribes Mission-Publications  
 P.O. Box 1079, Goroka, E.H.P.  
 Papua New Guinea  
 1991/500